

## 每週經課朗誦經文(巴克禮漢羅/教羅)2014/09/21

### 共同經課 - 1 出埃及記十六章二節~十五節

2 以色列人全會 tī 曠野哀怨摩西、亞倫。3 以色列人對 in 講：M̄值 tiòh 阮 tī 埃及地死 tī 耶和華 ê 手。Hit 時阮有肉滿鼎，有餅 thang 食到飽；lín chhoā 阮出來到 chit-ê 曠野，是 beh hō chit-ê 全會 lóng 餓死。4 耶和華對摩西講：看 ah，我 beh tù 天落米糧 hō lín；百姓 tiòh 出去，tāk 日拾 tāk 日 ê 額；我 thang 試驗 in，看 in beh thàn 我 ê 法度 á m̄。5 到第六日，in tiòh 將所拾入來 ê，備辦好勢，比 tāk 日所拾 ê 重倍 choē。6 摩西、亞倫對以色列眾人講：到 ê-hng lín beh 知，chhoā lín 出埃及地 ê 是耶和華。7 明 á 早起 lín beh 看見耶和華 ê 榮光；因為耶和華聽見 lín 哀怨伊；阮算甚麼，lín 竟然哀怨阮？8 摩西 koh 講：耶和華 ê-hng 時 beh hō lín 食肉，早起時 beh hō lín 食餅到飽；因為 lín 哀怨耶和華，伊 lóng 聽見；阮算甚麼？lín m̄ 是哀怨阮，是哀怨耶和華。9 摩西對亞倫講：你 tiòh kā 以色列人全會講：Lín tiòh 就近耶和華 ê 面前；因為伊已經聽見 lín ê 哀怨 lah。10 亞倫 tú-tú 對以色列人全會講話 ê 時，in òng 曠野 teh 看，看 ah，耶和華 ê 榮光 tī 雲中顯現。11 耶和華對摩西講：12 我已經聽見以色列人 ê 哀怨；你 tiòh kā in 講：到黃昏 ê 時，lín beh 食肉，早起 beh 有餅 thang 食飽；lín 就知我是耶和華 lín ê 上帝。13 到 ê-hng 有鶴鶉飛來，遮蓋營盤；天光早 tī 營盤四圍 ê 地面，有一重(têng)ê 露水。14 露水乾 ê 時，看 ah，曠野 ê 地面有細細圓圓 ê 物；細 到親像霜。15 以色列人看見，m̄ 知是甚麼，大家相 kap 講：這是甚麼 ah？摩西 kā in 講：這就是耶和華 hō lín 食 ê 餅。

### 共同經課 - 2 詩篇一百零五篇一節~六節，三十七節~四十五節

1 Lín tiòh 感謝耶和華，求叫伊 ê 名；Tī 萬百姓 ê 中間報揚伊 ê 所做。2 Tiòh òng 伊詩，òng 伊唱歌 o-ló，談論伊一切奇妙 ê 所行。3 Tiòh 因為伊 ê 聖名來誇口；Chhē 耶和華 ê 人，心內 tiòh 歡喜。4 Tiòh 求耶和華 kap 伊 ê 權能；常常 chhē 見伊 ê 面。5 伊 ê 奴僕亞伯拉罕 ê 後裔，伊所揀雅各 ê kiáⁿ 孫 ah，Lín tiòh siàu 念伊所做奇妙 ê 事，Kap 伊 ê 神跡，kap 伊 ê 嘴判斷 ê 話。6 b 37 伊 chhoā in 出來，帶銀帶金；伊 ê 支派中，無一個軟弱 ê 人。38 In 出來 ê 時，埃及就歡喜，因為埃及 bat 為 tiòh in 來驚。39 伊起雲做布篷，暝時用火照光。40 In 一下求，伊就 hō 鶴鶉飛來，Koh 用天 ê 餅 hō in 飽足。41 伊 phah 開石磐，水就 chhèng 出；Tī 乾地水流親像河。42 因為伊記念伊聖 ê 話，Kap 伊 ê 奴僕亞伯拉罕。43 伊 chhoā 伊 ê 百姓大悅出來，Chhoā 伊揀 ê 百姓唱歡喜 ê 歌出來。44 伊將列國 ê 地賞賜 in，In 就承接 hiah-ê 百姓 tiòh 磨所得 tiòh-ê；45 Beh hō in thàn 伊 ê 律例，守伊 ê 法度。Lín tiòh o-ló 耶和華。

### 共同經課 - 3 腓立比書一章二十一節~三十節

21 因為論到我，活就是基督，死就是利益。22 設使活 tī 肉體，這是做我 ê 工 ê 果子，我也 m̄ 知 beh 怎樣揀。23 我 tī 兩難 ê 中間，真 ài tò 去 kap 基督 saⁿ-kap tī-teh，是不止 khah 好。24 總是猶原 toà tī 肉體，為 tiòh lín ê 緣故，是 koh-khah 要緊。25 我已經深信 chit-ê，就知我 beh 猶原 tī-teh，也 kap lín 眾人 saⁿ-kap tī-teh，致到 lín ê 信得 tiòh 進步 koh 歡喜；26 hō lín tī 基督耶穌 ê 誇口，為 tiòh 我會 ná 充滿，是 tù 我 kap lín koh tī-teh。27 獨獨 lín 行 tī-chì tiòh 合 tī 基督 ê 福音；hō 我 kiám-chhái 來見 tiòh lín，á 是離開 lín，會聽見 lín ê tī-chì，就是 lín tī 一個神 khiā 在，用一心為 tiòh 福音 ê 信 saⁿ-kap 出力；28 凡 tī-chì 無 hō 對敵 phah 驚；這是做 in 滅無 ê 憑據，也是做 lín 得救 ê 憑據；lóng 是 tù 上帝。29 因為已經賞賜 lín 為 tiòh 基督，m̄-nā 信靠伊，koh 為 tiòh 伊受苦；30 lín 出力交戰，kap 前所看見我 ê，現今所聽見我 ê 相同。

### 共同經課 - 4 馬太福音十章一節~十六節

1 因為天國親像家主透早出去倩(chhiáⁿ)工人伊 ê 葡萄園；2 kap 做工 ê 人約一日一錢銀；就差 in 入伊 ê 園。3 九點 ê 時出去，koh 看見有閒閒 khiā tī 街市裡 ê，就 kā in 講，4 Lín 亦去葡萄園，我 beh 照公道 hō lín；in 就去。5 十二點 kap 三點 ê 時 koh 出去，也 án-ni 做。6 五點 ê 時出去，koh tú-tiòh 有人 khiā-teh，就 kā in 講，Lín 啥事 thong 日閒閒 khiā tī chia ah？7 In kā 伊講，因為無人倩阮。伊 kā in 講，Lín 也去葡萄園。8 到日暗，園主 kā 伊 ê 管家講，叫做工 ê，hō in 工錢，tù 路尾來 ê 起，到事先來 ê 為止。9 Hiah-ê 五點鐘所倩 ê 到，tāk-ê 領一錢銀。10 事先倩 ê 到，in phah 算 beh 領 khah choē；m̄-kú in 也 tāk-ê 領一錢銀。11 領了，就對家主 ngáuh-ngáuh 念講，12 阮 thong 日拖磨受熱；hiah-ê 路尾倩 ê，做工一點鐘久，竟然 hō in kap 阮平。13 伊就對 in 一人應講，朋友 ah，我 m̄ 是無公道款待你；你 kiám m̄ 是 kap 我約一錢銀 mah？14 你 ê 你 thèh，做你去。我 beh hō chit-ê 路尾 ê kap 你平。15 用我 ê 物，行我所 ài，kiám boē 做得？á 是因為我做好，你 teh 目赤 mah？16 親像 án-ni，路尾 ê beh 做事先，事先 ê beh 做路尾。